

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗門布，膠正對甜甜夢肚醒來个僵攢手；難得个放棄日，懶在眠床看日頭輕輕徒步、聽窗門外鳥聲吱啣，時間也像恬恬頓腳咧，啊！這靚靚个朝晨。

食飽朝，想去尋久無見面个朋友遠寮。自家駛車，時間扼在自家个手頭町，做得慢慢仔行、定定仔寮；經過鬧熱个街路，車輪仔轉落鄉道，來到苗栗个穀倉——灣裡。路兩片金黃飽米个禾串強強會對田肚淳出來；風吹來，一陣一陣歡喜到手攘腳踏、搖頭扭腰个金黃稻浪，分人心情暢快。田脣企等兩個在該比手畫脚个阿伯，日頭晟來，笠嬾下晒到烏刻刻个面町，單淨看著兩排雪白个牙齒，想來應該當滿意今年係好年冬咧！

幹過一隻大彎幹，共樣係闊野野个田地，直直透到山下；深深淺淺个黃襯等青青个田、綠綠个大樹，像係天公伯个調色盤，乜係這隻豐收季節正有个景色。該向有幾夫既經割忒早冬禾，準備愛過蒔二冬禾个田，田水鮮鮮，將朗朗个藍天膠白雲、田脣个樹仔膠人家个屋，清清楚楚反映出來，斯像框在用田塍做相框裡

肚个相片，實在還靚。這向堵好有一夫田當在該割禾，紅色个割禾機在田肚緊行緊割，三、四個人个脣頭搵手，無閒直掣；割禾機背後跔歸陣白鶴，有兜低頭絡食、有兜大步行尋食、有兜飛高飛低搶食，鬧熱煎煎，這斯係田肚最有生命力个畫面咧！

車仔慢慢仔溜落莊頭，伏在路脣个老狗牯看著車仔來，伸懶筋企起來拂尾，像迎接老朋友樣。一個著花衫个伯姆跔在屋面前个菜園摘菜，菜園分屋蔭等、日頭旨有晒著，青里里个菜葉面還有露水，看起來當萋、當錫人食。兩個國小年紀个細阿哥仔，一儕慢慢仔箭自行車、一儕半行半走、手町還拗等籃球，嘻嘻哈哈有講有笑愛共下去打球仔。這一路个光景，實在分人心情鬆爽。

主人準備好一桌點心、地豆膠瓜子，還有清香个高山烏龍茶，三、四個當久無見面个老朋友，天南地北講到毋知天合地。茶香、情醺，靚靚个日仔、靚靚个心情，這斯係簡單个幸福。

【頭回蹶大山】范振新原作

「避暑來去蹶百岳，愛無？」斯因為這句話，佢三兄弟斯跔等滿叔，共下去蹶人生个第一座大山。該兩時，佢還毋知蹶恁樣个高山有麼个特別，乜毋了解蹶三千米以上个山愛知得哪兜孔竅，佢這從細戴山肚个半桶水，還話著摺頭擺蹶个五指山、石門山這兜淺山仔爭七毋爭八¹，無頭無腦斯想跔等去，正經係細和尚仔唸金剛經——毋知頭又毋知尾。

記得該擺蹶个係池有山摺品田山，滿叔安排兩日兩夜。頭暗晡佢兜先歇在武陵農場，第二日打早六點就出發，按算斷烏前行到新達營地。頭下碼正開始蹶該下，佢話著自家个體力當好，平常乜有運動个習慣，所以行盡遽，想愛早一息蹶上山頭。無胚著，正行點零鐘斯佇毋著，歸身汗流脈落，強強會啟氣毋出。

佢試著盡奇怪，這擺愛蹶山以前，佢還釘工逐日去運動坪練習，仰會還係恁恁？背尾正知，係因為山頂个氧氣較少，又愛背食糧、滾水、襖婆這兜，加加起來完²十公斤个東西，身體需要還較多个能量，正會行一細節就啟大氣。該載，老弟乜摺佢共樣，

佢緊啟大氣緊問滿叔：「會到旨？還有幾遠？」滿叔笑笑仔應講：「還旨得時哦，登山口就還旨到！加油！」聽著滿叔恁樣講，佢正經愛嗽無目汁，高不將摺自家个包袱擡起來刻耐仔續等行往上。滿叔又講：「毋好行恁遽，山又毋會走忒，定定仔行斯好，恁咧就頓恬下來歇睏，山頂个風景當靚哦！」

斷真，山頂个路彎彎幹幹，毋過見轉一隻彎斯有新个天地，在山肚滿哪仔都係好風光，尤其係對面个群山，在半山排遠遠看過去，一遍青里里，加勝青天摺白雲不時變化，每一分鐘、每一秒都像係無共樣个風景明信片。歸路還有鳥仔、蟲仔在該唧唧唧，佢斯在這大自然个音樂會裡肚，一頭享受山頂个美景；一頭手爬腳蹶繼續行。三不二時還做得看著鷓鴣在天頂飛來飛去，感覺當自在、當自由。就在佢看到慧神發琢呆个時節，忽然間聽著阿哥大嫲牯聲喊：「噯！看著三角點囉！」佢煞煞三步做兩步走等上。等蹶到山嶺頂，心肝肚个感動，害佢目汁險險流出來。

到該下佢正知，蹶山恁錫人个原因。

¹ 爭七毋爭八：音 zang` cid m zang` bad；差不多。

² 完：音 von；全部。

112 年全國語文競賽客家語朗讀文章高中學生組（海陸腔）

編號 3 號

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該時堵好係梅雨季節，落過水、起風咧，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩虹，還鼻得著馬膠路¹分日頭煎過、分兩水打過以後淡淡、香香个味道，臨暗頭窗門外背一陣一陣「搵搵搵——搵搵搵——」个蟬仔聲跔等清風傳落屋肚來。

佢想起還細時節，熱燻燻个下晝頭，佢這兜姊妹會摻隔壁鄰舍个細人仔伴共下搞，長下搞到斷烏，聽著阿姆開聲喊：「好轉來洗手食飯咧！」正盼得轉屋。

佢爸係客運司機，平常時愛輪班，所以總係暗晡頭八、九點正下班。當記得係堵好該日無伸麼个飯菜，佢爸會自家煮麵食。逐擺佢就先摻蒜頭礮礮仔剁到幼幼、滷一息豆油還過香油在碗公肚，續等摻煮好个麵撈起來，水泌燥倒在碗公肚，摻蒜頭、配頭共下攪分佢勻，該兩時係聽著佢爸問：「有麼人愛食麵無？」佢這兜就當暢，遽遽飄落灶下，你一口、佢一口，又賺著一餐香噴

噴个宵夜，食到飽餬餬仔，還幸福哪！佢爸摻个飯菜間等伸無幾多條个麵，儘採划落肚，就恁樣過一餐。

又還記得，熱天臨暗仔洗好身腳，等到食飽夜檢拏好、寫好作業、看一下電視，細人仔還細又好搞，差毋多到愛上眠床該下，又一身汗咧。頭擺屋下無恁好額，斯有一隻間房安有冷氣定定。阿姆會在睡目前半點鐘摻冷氣擰開來，等到大家愛睡該下，間房門打啊開來，斯有涼沁沁个冷氣吹來，歸屋人一下仔就睡落覺咧。

這幸福个滋味一直固在佢个心肝肚，毋多知仔成人長大、做人阿姆以後，正知「賺錢可比針挑笏，使錢可比水推沙。」乜正體會爺哀頭擺辛苦畜大佢這兜細人仔，還過愛理一隻家哪有恁該？毋過該愛盡个責任摻義務，佢兜從來都毋識放忒過。

¹ 馬膠路：音 ma ga lu⁺；柏油路。